

1. Ո՞ր պնդումն է ճիշտ.

- 1) վկան կարող է իր բնակության վայրի առաջին ատյանի դատարանի կողմից հարցաքննվել դատական հանձնարարության կարգով, եթե վկայի ներկայանալը դատաքննությանը նպատակահարմար չէ աշխատանքային ծանրաբեռնվածության պատճառով,
- 2) գործն ըստ տարածքային ընդդատության կամ ըստ ենթակայության ստացած դատարանը յոթնօրյա ժամկետում որոշում է կայացնում այն վարույթ ընդունելու կամ գործը ՀՀ վճռաբեկ դատարանի նախագահին ուղարկելու մասին, եթե համաձայն չէ գործի տարածքային ընդդատությանը կամ ենթակայությանը,
- 3) եթե հայցապահանջն իր բնույթով այնպիսին է, որ հայցադիմում ներկայացնելու պահին անհնար է որոշել հայցագնի չափը, ապա դատարանը հետաձգում է պետական տուրքի վճարումը և դատական ակտով անդրադառնում գործի քննության ընթացքում որոշված հայցագնին համապատասխան պետական տուրք գանձելու հարցին,
- 4) առաջին ատյանի դատարանը մերժում է հայցադիմումի ընդունումը, եթե ամուսինը կնոջ հղիության ժամանակ առանց կնոջ համաձայնության ամուսնալուծության հայցադիմում է ներկայացրել դատարան:

2. Ռ.-ն, ով աշխատում է «Տ» ՍՊԸ-ում՝ որպես գործավար, ընկերության տնօրենի հանձնարարությամբ կատարում է լուսանկարներ: Ընկերությունը մտադրություն է ունենում նշված լուսանկարներով կազմել պատկերազարդ գրքեր և վաճառել, սակայն նշված նպատակի մասին Ռ.-ն չի տեղեկացվում:

Լուսանկարները հանձնելուց հետո «Տ» ՍՊԸ-ն կազմում և վաճառքի է ներկայացնում Գյումրի քաղաքի տեսարժան վայրերը ներկայացնող պատկերազարդ գրքեր:

Ռ.-ն հայտնում է «Տ» ՍՊԸ-ի տնօրենին, որ ընկերությունը պարտավոր է իրեն վճարել հոնորարի կրկնապատիկի չափով փոխհատուցում, քանի որ իր կողմից կատարված լուսանկարներն ընկերությունն օգտագործել է ձեռնարկատիրական գործունեություն ծավալելու և շահույթ ստանալու համար, սակայն սահմանված կարգով իր համաձայնությունը չի ստացել: Բացի այդ, տպագրված գրքերում չի նշվել լուսանկարների հեղինակի անունը, ինչը նույնպես իր իրավունքների խախտում է:

«Տ» ՍՊԸ-ի տնօրենը առարկում է ներկայացված պահանջի դեմ՝ պատճառաբանելով, որ Ռ.-ն կատարել է իր աշխատանքը, իսկ աշխատանքների արդյունքի իրավատերը

ընկերությունն է, քանի որ աշխատանքային պայմանագրով կամ կողմերի փոխադարձ համաձայնությամբ այլ բան նախատեսված չէ:

Նկարագրված փաստերից ելնելով՝ վերլուծել իրավահարաբերության նկատմամբ կիրառելի իրավական նորմերը՝ նշելով, թե որ կողմի պահանջներն են հիմնավոր, իսկ որ կողմինը՝ անհիմն: